

TARIKH: 8/3/2022

SURAT KHABAR: Kosmo

MUKA SURAT: 15

## Kadar kemalangan perjalanan, industri 2022 turun 80 peratus

**KUALA LUMPUR** – Rekod penurunan kadar kemalangan perjalanan dan industri telah mencatatkan penurunan sehingga 80 peratus ekoran pelaksanaan Ops Cegah sepanjang tahun lepas.

Ketua Eksekutif Perkeso, Datuk Seri Dr. Mohammed Azman Aziz Mohammed berkata, 26 majikan telah terkeluar dari senarai 100 majikan tertinggi kemalangan Perkeso dalam kategori kemalangan perjalanan.

Jelasnya, penurunan kadar kemalangan dilihat menurun antara 12 peratus hingga 80 peratus pada tahun lepas berbanding tahun 2021.

"Dalam kalangan majikan yang masih dalam senarai pula, 22 peratus daripada mereka telah menunjukkan penurunan dalam kadar kemalangan perjalanan berbanding tahun sebelumnya.

"Bagi kategori kemalangan industri, seramai 32 majikan telah berjaya keluar dari senarai 100 majikan tertinggi kemalangan Perkeso," katanya dalam Majlis Pelancaran Ops Cegah 2023 di Menara Perkeso, semalam.

Tambah Mohammed Azman, 'soft approach' menerusi Ops Cegah ini diharap akan dapat membentuk budaya pencegahan di setiap perusahaan di negara ini dan mampu meningkatkan



**MOHAMMED AZMAN** melakukan gimik pelepasan di Majlis Pelancaran Ops Cegah 2023 di Menara Perkeso, Kuala Lumpur semalam.

kesejahteraan golongan pekerja.

"Seperti yang sering saya tekankan, usaha pencegahan kemalangan ini bukanlah suatu kos, sebaliknya merupakan suatu pelaburan yang akan menguntungkan majikan dalam jangka masa panjang," ujarnya.

Bertemakan 'Kebersamaan Mengurangi Risiko Kecelakaan dan Kematian Pekerja', Ops Cegah yang dilaksanakan pada tahun kedua ini akan berjalan selama dua minggu bermula hari ini hingga 22 Mac.

Sepanjang tempoh ini, lawatan akan dibuat ke lebih 1,000 premis majikan seluruh negara bagi bertemu pengurusan tertinggi syarikat-syarikat yang merekodkan kemalangan tertinggi.

Ops Cegah tahun ini dilaksanakan bersama Jabatan Keselamatan dan Kesihatan Pekerjaan, Polis Diraja Malaysia, dan Institut Keselamatan dan Kesihatan Pekerjaan Kebangsaan.

Ia turut disokong Jabatan Pengangkutan Jalan.